

Til
Alver kommune
v/ordfører



**KRAV OM LOVLEGKONTROLL – Kommunestyret - SAK 145/20
SAMARBEIDSAVTALE MED AUSTRHEIM KOMMUNE – ÅSHEIM SKULEKRINS**

Den 26. november 2020 gjorde fleirtalet i Alver kommunestyre følgjande vedtak:

KO-145/20 Vedtak: Ny avtale mellom Austrheim og Alver kommunar om Kaland skulekrins som ein interkommunal skulekrins vert ikkje etablert. Elevar på 1.-7. trinn i tidlegare Åsheim skulekrins får Lindås barneskule som sin nærskule.

Kommunestyret ber rådmannen sørgje for at skulane på Lindås legg til rette for at elevane frå Åsheim blir godt ivaretatt når dei startar hausten 2021. Kommunestyret forventar at rådmannen stiller ressursar til rådvelde for skulane.

Framlegget fekk 25 røyster og vart vedtatt (7H, 7Ap, 7KrF, 1V, 1RV, 1Frp og 1Uavh)

Framlegg frå J.Hellestveit-Sp: Alver kommune inngår ny avtale med Austrheim kommune om kjøp av skuleplassar for Åsheimlevane 1-7 klasse på Kaland skule. Kommunestyret vil gjera ei ny vurdering om kjøp av plassar i rulleringa av kommunedelplan skule.

Framlegget fekk 22 røyser og fall (8 SP, 9 Uavh., 2 SV, R.Bø-FRP og 2 MDG)

Mindretalet er av den oppfatning at ordninga med den interkommunale skulekrinsen, lokalisert til Kaland i Austrheim kommune, og som har fungert i ca 60 år, er å sjå på som ein del av skulestrukturen i Alver (tidl. Lindås) kommune, og at ei eventuell endring krev tilsvarende sakshandsaming - jf. Utdanningsdirektoratet sin rettleiar: *Behandlingen av saker om skolenedleggelser og kretsgrenser Udir-2-2012. (vedl.)*

Mindretalet vil streka under at det er eit ulovfesta forvaltningsrettsleg prinsipp at forvaltninga skal treffa vedtak etter at saka har vore handsama på forsvarleg måte. Dette krev at ei sak er tilstrekkeleg opplyst før det vert gjort vedtak. I denne saka meiner vi at sakshandsaminga er svært mangelfull.

Spørsmål om skulestruktur vil i stor grad berøra foreldre, born og nærmiljø. Det bør difor vere eit rimeleg krav at kommunestyret får kjennskap til synspunkta til dei som vert berørt av ei eventuell endring av at elevar vert flytta til ein ny skule, før vedtak

vert gjort. I denne saka har ikkje berørte foreldre, samarbeidsutval eller foreldreutval, elevråd eller andre aktuelle lag og organisasjonar i nærmiljøet fått høve til å uttala seg. Det har heller ikkje vore gitt informasjon til dei involverte partane.

Mindretalet vil også peika på at Barnekonvensjonen er tatt inn i norsk rett ved menneskerettslova i 2003, og forpliktar kommunane til å leggja vekt på barna sitt beste, m.a. i saker om skulestruktur, jf. artikkel 3 nr. 1.

Vedlagt følgjer saksutgreiinga, som heller ikkje er presis – slik mindretalet ser det. Det vart m.a. diskusjon i kommunestyremøtet om kva som er riktig elevtal og kostnader med samarbeidsavtalen.

I ettertid viser det seg også at skriv som er sendt til kommunen vedk. saka, ikkje har blitt lagt ved saka til politisk handsaming.

På bakgrunn av ovannemnde innleiing og § 59.1 i KommuneLOVA krev mindretalet at det vert gjort lovlegkontroll av saka.

Knarvik, 15. desember 2020

Foster Hellestveit
Alvin Hellestveit
Trif Johansen
Anna U. Nordlund

Vedlegg:

Kommunestyresak 145/20 i Alver kommune

Rundskriv U-dir-2-2012

Notat frå møte mellom Alver kommune og Austrheim kommune 8. okt. 2020

Klage på kommunestyrevedtaket frå Samarbeidsutvalet ved Kaland barne- og ungdomsskule

Klage på kommunestyrevedtaket frå Elevrådet ved Kaland barne- og ungdomsskule